

Il misteri da la fossa comunabla istorica a Domat è sclerì

DA MATHIAS SEIFERT E
IVO BERTHER*

■ **Grazia a l'attenziun da Peter Limpel ch'era sin montascha en il manaschi da la «tegra sa» sin l'areal da las Ovras da Domat SA ha finalmain pudì vegnir sclerì il misteri, nua che la fossa comunabla dal temp da las guerras franzosas da l'onn 1799 sa chatta. La primavaira han dà en egl ad el ils oss umans che la plievgia aveva lavà or da la scarpa al pe dal crest «Ils Aults» ch'è situà a l'ur da l'areal da la firma. La polizia chantunala ch'è vegnida infurmada immediatamain ha mess en segirezza questa ossa ed ha protocollà las circumstanzas dal chat.**

Anc avant ch'il medi forensic ha pudì examinar questa ossa ha er il servetsch archeologic dal Grischun survegnì la nova da quests chats. Per Urs Clavadetscher, archeolog dal chantun, èsi immediatamain stà cler ch'il lieu da chat è ina da las duas chaltgeras tschertgadas dapi ditg, en la quala èn vegnids sepulids ils Sursilvans ed ils Franzos ch'èn crudads en ils cumbats terribels che han gù lieu la primavaira 1799 en ils conturns da La Punt. Anc curt avant il cumenzament da las lavurs da construcziun da la Stallinger swiss timber SA aveva il servetsch archeologic tschertgà – tenor indicaziuns davart da la vischnanca burgaisa da Domat sco er davart dad istorichers – en il gaud da tieu vischin «Tuleu» fastizs da questas cuntraversas e rezanzas mortals da las persunas mazzadas. Questa tschertga era dentant stada vana.


Ils eveniments da l'onn 1799

Ils eveniments da guerra da l'onn 1799 en il Grischun stattan en in context paneuropeic. Suenten la revoluziun franzosa da l'onn 1789 ha la Frantscha cumbattì en las uschenunadas guerras da coaliziun (1792–1815) per la predominanza en l'Europa. Il medem mument eran las truppas da revoluziun persvadidas da l'idea da purtar la libertad, l'egualità e la fraternità als stadi absolutistics. L'onn 1798 – suenter che la confederaziun era vegnida occupada da la Frantscha – è er la republica da las trais lias vegnida stratga en ils turnigl da questas cuntraversas. Ils circuls conservativs dal Grischun han clamà truppas austriacas en agid; quai ha da l'autra vart provocà la Frantscha ed ha chaschunà l'invasiun da truppas franzosas il mars 1799. Il giuf da questa occupaziun è stà grev. En

tschertas partas dal territori alpin hai dà il 1. da matg 1799 ina rebelliun coordinada cunter l'occupaziun da las truppas franzosas. En il Grischun ha questa rebelliun cumenzà en la Cadi. Las guardias franzosas en ils singuls vitgs èn vegnidas arrestadas e manadas a Mustér. Las milissas sursilvanas han decidì da marschar vers Cuira cun ils praschuniers il di suenter. Ma alura hai dà la catastrofa. Per motivs che na pon betg pli vegnir reconstruids dal tuttafatg han las milissas sursilvanas mazzà sut Mustér passa 80 schuldads franzos arrestads. Alura èn ils purs ids da la Val giu ed han stratg cun sai ulteriuras vischnancas. La saira dals 2 da matg èn las emprimas avantguardias da las milissas sursilvanas arrivadas a La Punt.

Ils 3 da matg hai alura dà – tranter La Punt e Cuira – cumbats fitg sanguinuos tranter las milissas sursilvanas e l'armada franzosa. Quests cumbats descriva in rapport ch'ìls delegads helvetic Schwalller e Herzog han tramess il di suenter al directorium a Berna: «Uffiziers e schuldads conferman, ch'els n'hajan anc mai vesì en lur vita a cumbatter cun ina tala ravgia; malgrà las chanunadas las pli tremendas hajan quests paupers, armads cun sigirs, cun furtgas, cun zappas etc., attatgà sco nars ils Francs, ed independentamain da las plunas da morts che giaschevan davant els, han els repetì lur attatgas cun la resolutezza la pli gronda.» Er la gasetta «Freiheit – Gleichheit» che cumpareva da quel temp a Cuira e ch'era bainvulenta envers ils Franzos ha rapportà en sia ediziun dals 10 da matg 1799 sumegliantamain: «La moda e maniera co che quests cruschaders, tranter dad els perfìn mats da 12 fin 14 onns, èn ids en la mort, è incredibla. (...) Adina s'ha in bittà facultativamain en la baionetta d'in Franc, entant ch'in auter e ch'in terz ha dà fridas da surengiu cun ses truschet d'ina lunghezza da 3 fin 4 pes.»

L'emprim èsi reussì als purs da chatschar enavos ils Franzos fin avant Cuira. Las acziuns dad Onna Maria Bühler per sustegnair las milissas sursilvanas enconuscha anc oz tut la populaziun da Domat. La regenza transitorica a Cuira era gia sin il fugir or da la citad, perquai che l'invasiun da las milissas sursilvanas pareva mo d'esser ina dumonda dal temp. Ma alura ha midà la fortuna. Ils Franzos han survegnì sustegn da chavalgiaders husars ed han pudì rebatter las milissas sursilvanas. Suenten la fin da la battaglia èn ils Franzos ids da la Val si,



Claudio Caprez dal servetsch archeologic dal Grischun che documentescha cun in disegni la chaltgera e la stresa che cuntegna skelets (paliet).



Processiun da funs a la Cresta da Morts, 1910.

FOTOS MAD

speravia il vitg da Tumein che ardeva. A Mustér han els chattà las unifurmas sanglentadas da lur camarats assassinads. Per vendetga han els alura dà fieu al vitg ed a la claustra.

Sin il champ da battaglia tranter Cuira, Domat e Panaduz sa chattavan – tenor funtaunas contemporanas – passa 600 morts da las milissas sursilvanas sco er in dumber considerabel da Franzos. Ils 6 da matg ha la regenza provisorica drizà la suandanta comunicaziun a las vischnancas: «Burgais! Sco nus avais er Vus dudi u observà cun il pli grond displaschier dal cas trist da noss chars cumpatriots da l'anteriura lia sura. La precauziun pretenda ussa che las baras ed insumma tut ils morts che giaschan anc en la foppa dal champ da battaglia vegnian sepulids profundamain en la terra, e quai senza perder temp per betg exponer nosa chara patria ad in mal anc pli grond, a la pestilenza.» Ina part da las baras è vegnida sepulida en moda apaina sufficiente en las chaltgeras. Dapi lura porta il crest davosvart il num «Cresta da morts». Fin lunsch en il 20avel tschienanter regurdavan ina crusch da lain ed ina processiun annuala als Sursilvans crudads il «onn dals Franzos» disfortunà.

Perditgas istoricas d'in trist gener

«I na vegn betg en dumonda d'exchavar e da metter en segirezza las persunas sepulidas, d'ina vart per respect da la pasch dals morts, da l'autra vart perquai che quest monument da fossa n'è betg periclità d'in project da construcziun», ha

declerà l'archeolog chantunale Urs Clavadetscher. L'examinaziun archeologica e la documentaziun sa restrenschan a la scarpa, or da la quala èn vegnids lavads or ils oss umans. Suenten che la spunda è vegnida nettegiada premurusamain è cumparida en moda bain visibla la miraglia da la chaltgera ch'è vegnida costruida dus meters vers engiu en la terra. L'ossa umana ha furmà – entaifer la chaltgera – ina vetta da circa 30 cm ch'è vegnida cumprimida fermamain da la terra e da la crappa ch'è vegnida plunada sur las baras. Schebain ch'i n'hàn betg dastgà vegnir allontanadas parts dals skelets ha l'antropologa Christina Papageorgopoulou che lavura per il servetsch archeologic pudì trair tschertas conclusiuns da l'ossa liberada concernent la moda da sepulir las baras, concernent la vegliadetgna e concernent la schlattaina da las persunas mortas sco er concernent la chargia corporala da quel temp: «Ils skelets giaschan en crusch ed en travers in sin l'auter. Sco ch'i para èn las persunas mortas simplamain vegnidas bittadas en il foss da la chaltgera. L'ossa deriva oravant tut d'individis masculins. Però han ins er pudì distinguer in skelet d'ina dumna. La gronda part da l'ossa deriva d'umans giuvens sut 20 onns, dentant per part er d'umans creschids. Las giugadiras ed ils spundigl da las persunas mortas èn fitg isads. Quai mussa che la vita da quel temp era dira e segnada da greva lavur corporala, da paupradad e da stgarsezza da mangiativas. Er sch'i sa tracta mo d'ossa, il destin da las persunas

ch'èn sepulidas qua ans commova tuttina.»

La fossa daventa in monument

Che la chaltgera cun las persunas sepulidas na dastga betg vegnir laschada en il stadi actual, era cler a tut las persunas partecipadas. Il privel che quest foss vegnia donnegià anc pli fitg da l'erosiun, per negligentscha u cun intenziun, era memia grond. Ensemen cun la vischnanca burgaisa da Domat è il servetsch archeologic arrivà a la conclusiun ch'in mir da mantel che vegn emplenì si davostiers saja la meglra protecziun per la chaltgera averta per part e per la vetta d'ossa scuverta. Al-legraivlamain han las persunas responsablas da las Ovras da Domat SA, da la trega sa e da la vischnanca burgaisa da Domat sa declaradas prontas da surpigliar ils custs da construcziun. Per ch'il lieu e per che la regurdanza a quests eveniments sanguinuos na gajan betg a perder en il futur, vegn il mir munì cun la data e cun in text che renda attent en rumantsch ed in tudestg a questa fossa. «Uschia sa transformà la fossa en in monument», ha declerà Theo Haas da la vischnanca burgaisa. Perquai che persunas nunautorizadas na dastgan betg entrar en l'areal da la Ems-Chemie SA vegni renvià cun ina tavla vi da la vart dadora da la saiv da giatter per lung da la via da Pols a la fossa comunabla ed als connexs istorics.

* Mathias Seifert lavura tar il Servetsch archeologic dal Grischun Ivo Berther lavura tar l'Uffizi chantunale da cultura e promoziun da cultura



Süsaren verjagen den Landsturm in Birsten

Gravura temporana da la battaglia dals 3 da matg 1799.